

«La pcd ha in cler profil burgais»

Pcd 60+ dal Grischun: Visita da Gerhard Pfister

DA GION NUTEGN STGIER / ANR

■ **La pcd duai er en l'avegnir restar ina partida dal center. Er cun il tema famiglia vegnia ella a s'occupar en il futur. Persuenter saja ina entrada en l'Uniu europeica per el strusch nudà en sia agenda, manegia Gerhard Pfister, il nov president da la pcd svizra.** Dapi diesch dis ha la pcd svizra in nov president. *Gerhard Pfister*, il cusseglier naziunal dal chantun Zug, è il successur da *Christophe Darbellay*, il cusseglier naziunal vallaisan ch'è stà ils davos diesch onns al timun da la pcd naziunala. Ier ha il nov president dals cristiandemocrats svizzers fatg ina visita a la pcd 60+ dal Grischun a Cuira. En quel mument è sia visita stada l'emprima en noss chantun sco nov president da la pcd svizra. Avant l'occurrenza en l'hotel Chur ha l'anr gì occasiun da discurre cun Gerhard Pfister.

Absolvent dal gimnasi claustral a Mustér

Cusseglier naziunal è Pfister, l'um da 54 onns, dapi il 2003. Suentar la scola primara ad Oberägeri ZG ha el fatg il gimnasi claustral a Mustér e terminà quel cun la matura typus A. Anc oz ha Pfister buns contacts cun la scola, la claustra e ses paders benedictins. Sia scolaziun ha el cuntesc continuà a las universitads da Friburg e Berlin e studegià germanistica e filosofia. Cun avair fatg dal 1985 fin il 1992 il gimnasi a Mustér enconuscha el bain il Grischnun, ha menziunà il nov president da la pcd svizra. Ultra da quai saja el decennis er stà cun sia scola a Laax durant las vacanzas da sport e da scola. Tranter Na-



Gerhard Pfister, il nov president da la pcd svizra, è stà ier a Cuira giast da la pcd grischuna 60+.

FOTO G. N. STGIER

dal e Bumaun saja el dapi blers onns adina en l'Engiadina, ha ditg Pfister.

Process da renovaziun pcd 2025

El saja pertschert che la pcd grischuna haja sco er autras partidas chantunalas strusch pli lev. Tuttina haja la pcd dal Grischnun fermes represchentants a Berna e vitiers deriva cun *Tino Schneider*, il nov

president da la pcd giuvna svizra, er dal Grischnun. Quai sajan premissas idealas per in return tar il success. Sin champ naziunal vul Pfister cunzunt udir ed integrar tuts interessads per savair tge aspetativas che tus hajan da la pcd e tge che saja impurtant tar la pcd. Il process da renovaziun pcd 2025, quel vegnia instradà anc durant la stad e per quel sa laschia la

direcziun da la pcd er bler temp, punctuescha il cusseglier naziunal e president da la pcd svizra. La stad 2017 duaian l'organisaziun, ils cuntegns e la strategia per ils proxims onns esser fixads.

A Berna haja la pcd betg lev

El derivia d'in chantun nua che la pcd haja in ferm profil burgais ed haja cun quel-

la tenuta er success. Quai ha Pfister ditg sin la dumonda che la pcd fetschia a Berna plitost politica cun in center burgais-sanester ed el sco president plitost politica cun in center-burgais dretg. A Berna haja la pcd considerablamian pli grev, dentant sia posiziun sco dominante partida dal center duaia er en l'avegnir restar. «Cun dir che la pcd haja nagin profil fetschian blers savens malgist», accentuescha Pfister. La pcd haja in cler profil burgais, per ella sajan libertad, solidaritad e federalissem fitg impurtants. «Nus avain ina pli gronda varietad che autras partidas, quai è cler, cun avair in divers chantuns differents svilups, quai che sappia però er esser ina buna schanza», manegia l'anteriu absolvent dal gimnasi claustral da Mustér.

Sa tegnair a las convegnas

Er en l'avegnir s'engascha la pcd per il bain da las familias, ha ditg Pfister. L'iniziativa da famiglia na saja be per pauc betg vegnida acceptada, dentant la maioritad dals chantuns haja ella obtegnì. Nagin tema è per il nov president da la pcd svizra l'entrada en l'Uniu europeica (UE). El saja adina stà cunter e refusà da sa participar a l'UE. En l'agenda da las sfidas figurescha il tema UE strusch, ha ditg Pfister. Quai che pertutga la politica da fugitivs duaja la Svizra finalmain pretender da l'UE ch'ella sa tegnina a las convegnas. Sche quai saja il cas, lura haja la Svizra considerablamain in pli pitschen problem da migraziun. A la dumonda, trais giavischs persunals per la pcd svizra, ha ditg Pfister il suandant: «Success, success, success e tut tschai è agiunta.»